

宋十五家詩選

宋十五家詩選

東海陳訐

曾鞏

字子固建昌南豐人嘉祐二年進士及第調
太平州司法參軍召編校史館書籍歷館閣
較勘集賢較理兼判官告院嘗為英宗實錄
檢討官不踰月罷出通判越州歷知襄州洪
州進直龍圖閣知福州兼福建路兵馬鈐轄
賜緋衣銀魚召判太常寺改知明州徙亳州
又徙滄州過闕畱判三班院遷史館修撰管
勾編修院兼判太常寺擢試中書舍人賜金
紫丁母憂去數月
卒詩有南豐類藁

王介甫詩云曾子文章世希有木之江漢星
之斗 蘇東坡詩云醉翁門下士維運難為
賢曾子獨超軼孤芳陋羣妍 王子發云南
豐先生以文章名天下標驚奔放雄渾瓌偉
若三軍之朝氣猶獸之挾怒
江湖之波濤烟雲之姿狀
南豐詩峻削迥潔如孤峯天外卓立萬仞其
氣格在少陵昌黎之間 按彭淵村謂曾子

固不能詩竟與海棠無香同恨明王元翰著
稗史類編博綜今古然據詩話所見亦止多
景樓錢唐上元三詩而已近世選本亦俱闕
畧豈先生詩集昔晦今顯耶按先生嘗云詩
當使人一覽語盡而意有餘
固非淡於詩者不能道矣

一鶚

北風萬里開蓬蒿山木洶洶鳴波濤嘗聞一鶚今始見眼
駛骨緊精神豪天昏雪密飛轉疾暮略東海朝臨洮社中
□□神倏閃腦尾分磔垂弓藥巧兔獐雞失艸木勇鷺一
下崩其毛窟穴嘯嘯哭九子帳前活送雙青猱啁啾燕雀
誰爾數駭散亦自亡其曹勢疑空山竭九澤殺氣已應太
白高歸來礫嶼載俎豆快飲百甕行春醪酒酣始聞壯士
嘆丈夫試用何時遭

侯荆

侯羸夷門白髮翁荆軻易水奇節士偶邀禮數車上足暫
飽腥羶館中侈師廻拔劍不顧生酒酣拂衣亦送死磊落
高賢勿笑今參養傾人久如此

山檻小飲

變秋長雲豪灑雨北風壯餘燭尚爭威積晦頗異狀山間
攢楓鱗屋立懸狄上飲檻聚石爲罍筵注溪當歡言久誼
譚罷興一怡悵旅人正飄飄豈得諧放蕩

寄舍弟

新霖洗窮臘東南始知寒驚我千里意覺汝征途難空江
挂風席扁舟與誰安羈旅費亦久橐衣豈無單念汝西北

去壯心始桓桓竟逢有司惑斥走懷琅玕士固有大意秋
毫豈能于所憂道里困久無一罇歡我意生惻惻爲之却
朝餐人生飄零內何處懷抱寬已期採芝藥握手青霞端
無令及門喜淹留雪霜殘

送徐竑著作知康州

溪蠻背負命殺氣凌南州城郭漲烟火堂皇黷蜉蝣被髮
盡冠巾吾人反縲囚行剽至秒忽歸載越山丘駟攘事雖
定收合信瘡痍不有異澤霈何令餘患瘳寒風在林鳴君
馬不能留初佩太守章慨然任人憂問俗仄醯餘咄咄令
入謀士材爲世用因難乃知尤煩苛一蕩滌幽遠偏懷柔
四封鳴鷄犬五穀被原疇其間多娛宴歌鼓震溟陬明珠

每所希古人不難作日月有常運志士無安輒山川自茲
始努力千里遊

詠雪

北風蕭蕭鳴且歇短日悠悠生復滅朝含滄海滿天雲暮
斷行人千里雪初通壑谷氣先冷漸蔽郊原路疑絕併包
華藝德豈薄改造乾坤事尤譎驅除已與塵滓隔濯漑終
令枯槁悅相持始信竹柏勁易敗可嗟荏葦折條垂巧綴
如可愛胥井隨形呀且缺飛檐嚙嚙駕長浪巨壁林林倚
精鐵弊衣或有胥猶凍荒宴誰能耳偏熱壯夫撫劍生銳
氣志士扃門養高節已開襟胸絕煩惱更足溝塍慰空竭
雖無酒醴發嘲笑亦有詩謠恣搜抉新陽髣髴送鏡鑒舊

徑參差分曲折留當展齒印崖石徙倚長松看寥泖

靖安幽谷亭

橫江捨輕楫對面見青山行盡車馬塵豁見水石寰地氣
方以潔崖聲落潺潺誰爲千家縣正在清華間風烟凜人
心世慮自可刪况無訟訴鶯得有觴詠閑常疑此中吏白
首豈思還人情貴公卿燁燁就玉班光華雖一時憂悸或
滿顏鷄鳴已爭馳驪驪振鑣鑾豈知此中吏日高未開關
一才謹所守名聲別妖奸豈知此中吏一官老無瘕悄悄
謀謨消汨汨氣象屏豈知此中吏明心懾強頑况云此中
居一亭衆峯環崖聲夢猶聞谷秀立可攀倚天巉巖姿青
蒼露端爛對之精神恬一作可謝世網艱人生慕虛榮歛

收意常慳誠思此憂愉自應喜榛菅

寄子進弟

憶子去家日南風始吹衣今來日未幾蠅蚊已羣飛思子
兼晝夜何啻如渴饑喜聞遠客至手自排荆扉客送書一
紙翰墨子所揮上言山居惡夢寐接庭闈次言服畎畝永
黍廬以肥其餘業文字頗測隱與微題詩在紙尾語老意
不非我喜何所似大似客得歸我與子事親未飽藿與薇
常若去左右辛勤治鞍轡子行何時反我眼日以眯應須
畢秋刈相見懽依依

詠雪

巖巖層氷塞川澤洶洶北風鳴木石黃雲半夜滿千里大

雪平明淡一尺兩儀混合去纖間萬類韜藏絕塵迹蛟龍
岌起抱崗巒江海橫奔控阡陌野林縹緲苦難狀庭樹鮮
妍疑可摘開門更覺山市靜散帙偏宜紙牕白精光蕩射
徧巖谷氣象崢嶸見松柏少年登望就臺觀壯士衡陵向
沙磧饑飢卧伏牙爪獵隼飛挈矜羽翮茆簷客聚滿幽
缶桑徑人行沒雙屐高堂暖熱厭羅綺環堵蕭條尚絺綌
何當仰見白日照坐看先從沙際釋漸涵溝畎兆豐富澆
濯間閭消瘴疫便乘東北生氣起自駕疲牛理曉瘠

上人

金節橫光馬珂闌瑞鵲宮袍腰玉繞烟沙轆轤高軒過路
上千人瞻羽繖瑤魁精彩浮蒼龍江城四面生春風城中

壞屋書籤碧有客苦吟連旦夕麻衣塵暗抱書泣歲暮黃
梁不供食白日曛隴望龍坂坐上一言寒日暖西入天關
灑霖雨須惜窮鱗在泥土

初夏有感

我從得病卧閭巷三見夏物爭滋榮紅英紫萼逐風盡高
幹密葉還陰成山亭水館處處好朱碧萬實相駢擎林鳥
梁燕各生子翅羽已足爭飛騰雉鷄五色繡新翻鴛鴦慕
匹相隨鳴穴蜂露蝶亦有類歛往復聚何翺輕箔蠶滿室
事方盛繭綴下上如連星麥芒秧頭錯雜出高壠大澤填
黃青物從艸木及蟲鳥無一不自盈其情嗟我獨病不如
彼胷氣卧立常怵怵筋酸骨楚頭目眩強食豈得肌膚盈

我身今雖落衆後我志素欲希軻卿十年萬事常坎壈奔
走未足供藜藿愁勤未老鬚先白多學只自爲身兵自然
感疾憊形體後日雖復應伶俜非同世俗顧顏色所慕少
壯成功名但令命在尚可勉屑細詎足傷吾平

送人移知賀州

溪石膠船秋瀨微南山巉空勢叢巍風露氣嚴花艸緋天
色濛濛初燕飛君子往守東南圻旗旛綵錯如翔翬象齒
照地榮笏衣先後隸從何願願初君治縣參德威吾人涵
濡樂以肥念今奪去失所依出者遮行居者歎我思羣公
坐天圍心與星斗爭光輝薦賢絀否言無違迅若發石乘
高機何此茂器時所稀噤無一語爲發揮敢作此什傳王

畿旦暮璽書來勅歸

送陳商學士

柳黃半出年將破溪溜浸苔強萬箇溪頭蒲葦各萌芽山
梅最繁花已墮物色撩人思易狂况躋別館清何那城東
日晚公將去蘂影未離愁四座公於萬事不雕鐫心意恢
恢無坎壈來從奎壁光鋸下笑倚樽筵成郡課嗟予齷齪
才性下棄置合守丘樊餓公持姓名動人主被餽寧嫌筆
端挫從今清夜思江路夢送公船先北過

送僧晚容

飛光無停芳歲閑羣陽不行寒氣動疎篁有韻牕含雪重
幕無溫筆淒凍蕭條山艸葉始枯綽約江蘼先弄無人

爲我取酒斟有客前來乞詩送多情爲客不能已捲紙連書筆鋒縱七言百字拙且卑俗眼方憎汝休重

送叔延判官

北風吹空雪花冷平鋪雲濤冒峯頂江長水濶飛鳥絕沙樹參差動波影君子從戎碧油下綠髮青瞳笏袍整大馬高車府中罷一船沿流背丁丙魴魚勝銀尊酒美物物當前若圖屏危帆健櫓醉中去千里奔過猶一頃明年隨春到京國紅紫燒空拆桃杏獻書又謁蓬萊宮新斲豪曹試鋒穎况遇朝廷方急材驥駉駉足當聘

山茶花

山茶花開春未歸春歸正值花盛時蒼然老樹背誰種照

耀萬朶紅相圍蜂藏鳥伏不得見東風用力先吹噓追思
前者葉蓋地萬木慘慘攢空枝寒梅數綻小顏色霰雪滿
眼常相迷豈如此花開此日絳艷獨出凌朝曦爲憐勁意
似松柏欲攀更惜長依依山榴淺薄豈足比五月霧露空
芳非

舍弟南源刈稻

買田南山下禾黍忽已秋糟牀待此注豈止衣食謀窮陰
迫霜霰不可遲攀收吾黨二三子晨行已寒裘久苦城中
鄙至山諒優游況已除險穢新堂置嵩幽寒花開照曜谷
鳥樂啾啁心與珍境接佳興固已適而况饋朝夕甘美日
可搜黃鷄肥落俎清醑湛盈甌時鮮鱠永鯽餘滋拆丹榴

此味何以侑文辭頗賡酬晝務誠遺滯夜工督春掄因觀稼穡勞始覺奉養優此樂詎非幸人生復何求送子因自起往意不可留

丹霞洞

麻姑石壇起雲霧常意已極高峯巔豈知造化有神處別聳翠嶺參青天長松桀柏枝鬼砌中畫一道如流泉林風颭颭滿丘壑山鳥啁嘶凌飛烟山腰古亭豁可望下見秋色清無邊忽驚陰崖勢廻合中抱幽谷何平闊初誰鑿險構樓觀更使遶舍開芝田令人到此毛骨醒欲搆老筆丹青傳羗夷干戈今未解天地瘡痍誰能痊大厦棟梁置沙莽肯復顧盼楫與楫吾徒於時直何用欲往未得心茫然

牛山亭

樹杪蒼崖路屈盤，半臺亭榭午猶寒。平時舉眼看山處，到此憑欄直下看。

送歐陽員外歸覲滁州舍人

病卧不出門，非關避塵土。溪秋影雖清，孤懷與誰語。子問吾廬煇如就，賓廡足音固可喜。况久捉松麈，子生何其祥。家庭坐軻愈，顧我齒諸生。漸摩苦頑魯，有如仰天潢。勢豈識津渚，又若馬牛然。安能望熊虎，空擺在門心。常苦風中羽，羨子筋骨輕。歸飛得其所，從今夢無南。隨子渡江觴。

送鄭秀才

鄭生雙瞳光欲溢，我意海月藏其中。齒清髮紺心獨老，秋

南豐詩選
崖直聳千年松來趨學宮業文字進退珮玉何玲瓏一朝
疎書別我去馬蹄脫若風中蓬當今文人密如櫛子勿浪
漫西與東處身不可不擇處一跳萬里無還蹤

答石秀才月下

今宵月色明千里秋水與天無表裏樹木矯矯蛟龍蟠屋
瓦鱗鱗雪霜洗林下病人毛骨輕日愛清光不能已秋風
自作竽簫聲更送城笳夜聲起客衾初寒睡未能忽得子
詩哦以喜子求我和何勤劬我知枯疎少知己子真愛我
常存心安用蕪辭煩筆紙

東津歸催吳秀才寄酒

荒城懶出門常掩春氣欲歸寒不歛東鄰咫尺猶不到况

乃傍溪潭石險風光得暖才幾日不覺溪山碧於染欣然
與客到西岸衣幘不避塵泥點谷花洲艸各萌芽高下迸
生如刻刻梅花開早今已滿若洗新粧競妖嬈柳條前日
尚憔悴時節與催還在苒沙禽翅羽亦已好爭趁午暄浮
翠歛從今物物已可愛有酒便醉情何慊君厨山杏舊所
識速致百壺須灑灑心知萬事難刻畫惟有醉眠知不忤
預愁酩酊苦太熱已令灑屋鋪風簟

和章友直城東春日

東流抱孤城雨洗見春色風吹百艸根道路千里碧莫盡
溪漫漫去波瀾散無跡遙林缺見山冉冉蒼藹積沙禽有
留蹤文字不可識青松對桃李桃紅李花白紅白勢方競

青青守品側君意無不諧研談欲俱得賦詩多所陳炳若
觀邇拆城東不待到衆物已歷歷

洪州

洪州城中荒且遠每到弱馬常驅馳交朋顧我亦已厚謝
詞有禮寧當違人生有累乃汲汲萬事敦迫如銜羈山中
無塵木清白安得去吟梁甫辭

尹師魯

衆人生死如塵泥一賢廢死千載悲漢初董生不太用煖
政自此慙隆姬至今董生沒雖久語者爲漢常嗟歎尹公
素志任天下衆亦共望齊臯伊文章氣節蓋當世尚在功
德如毫釐安知蔓艸蔽原野雪霰步折齒松枝百身可贖

世豈惜訃告四至人猶疑悲公尚至于載後况復悲者同
其時非公生平舊相識踞向北極陳斯詩

發松門寄介甫

南風夜發吹孤舟起視北極星辰稠曉開征帆破長浪挾
以兩舫當中流松門東面見廬阜其上少日烟氣浮舟人
指我極四望黑處無底蛟龍湫櫓溪左蠡信浩蕩兩涘若
粒分岡丘落星困困熟可狀清漢夜獨垂牽牛故人曾期
此同載捨權直抵雲山遊念今五載負期語心獨動蕩風
中旂况聞肥遯須山在早時事力胡能謀所嗟親老食未
足安得一畝操鋤耨此言此笑吾此取非予世孰吾相投
今諧與子脫然去亦有文字歌唐周

讀五代史

唐衰匪一日遠自開元中尚傳十四帝始告曆數窮由來
根本強暴戾豈易攻嗟哉梁周間卒莫相始終興無累世
德滅若燭向風當時積薪上曾寧廢歌鐘

多雨

嗟江之濱地多雨冬雷不收開蟄戶陰氣濁晦化爲霧或
雲於山水於礎雜花萬株紅與紫臘風吹開不可數入春
十日寒始至春氣欲歸寒格住羣山巉空雪相亘挫折艸
木何可禦霖傾潦雨那復止穹林大丘滅無涖及今孟夏
理宜熱重裘無溫坐當午四時云然了安謂吁吾有愁誰
可語

八月二十九日小飲

陰陽在天地鼓吹猶橐籥煩蒸翕已盡灝氣乃浮薄羣山
翠相抱塵靄如洗濯川源亦虛徹派別歸衆壑囂音滅蛙
蚓効意動鵬鷃蠅蚊自不容雖有類鉗縛驅之舊苦衆忽
去寧匪樂俯仰自醒然意適忘體瘼天運雖已晏生物固
未剝蠶芋圃可掘禾黍田始獲脫苞紫栗迸透葉紅梨渥
幽花媚清景鮮聚耀新萼西風動孤標露曉愈修擢能終
犯寒沍詎可忽纖弱况當九日近家釀成已昨溫顏几杖
適弱質衣冠恪閨門自可會非必千里約筇筴出人指邏
迤奮宮角初言小人獻終拜長者酢清言喜自洽細故憂
可畧幸無職事顧况荷租賦薄讀書有休暇得醉且吟噉

九月九日

淒淒風露滋靡靡塵霜屏已折廬舍清未苦裘褐冷眠食
味尤嘉起坐日尚永虛天照積水精鑑出幽礦石瑩見山
稜林疎覺牕間黃花宿盡破艷艷晨粧靚頻尋遠逕香每
愛蒼池影爲誰佳色鮮慰我貧齋靜寒醅出家法異果得
他境甘腴饌新兔醜怪薦修螯蒲猛反幽閑重時節老大珍
物景獻酬興未薄比飆思猶騁况同親戚歡詎匪田野幸
俱醉任栖鴟燭炬尚可秉

讀書

吾性雖嗜學年少不自強所至未及門安能望其堂荏苒
歲云暮家事已獨當經營食衆口四方走遑遑一身如飛

雲遇風任飄揚山川浩無涯險怪靡不嘗落日號虎豹吾
未停車箱波濤動蛟龍吾方進舟航所勤半天下所濟一
毫芒最自憶往歲病軀久羸尫呻吟千里外蒼黃值親喪
母弟各在遠計歸恐驚惶凶禍甘獨任危形載孤艤崎嶇
護旅櫬緬邈投故鄉至今驚未定生還乃非常憂慮心膽
耗驅馳筋力傷况已近衰境而常犯風霜驅之久如此負
疴固宜長朝晡暫一飽百回步空廊未免廢坐卧其能眎
縑紵新知固云少舊學亦已忘百家異旨趣六經富文章
其言既卓濶其義固荒茫古人至白首搜窮敗肝腸僅名
通一藝著書欲煌煌瑕疵自掩覆後世更昭彰世久無孔
子指畫隨其方後生以中才曾臆妄度量彼專猶未達吾

備復何望端憂類童稚習書創偏傍况令議文物規摹詎
能詳輪轅孰撓直冠蓋孰纁黃珪璋國之器孰殺孰鋒鉞
問十九未諭其一猶面墻幾微言性命萌兆審興亡茲尤
覺浩浩吾詎免俛俛回思幸尚壯曷不自激昂前謀信已
拙來效庶云臧漸有田數畝春秋可耕桑休問就醫藥疾
病可消穰性本反澄澈情田去榛荒長編倚修架大軸解
溪囊收功畏奔景窺星起幽房虛牕達溪暝明膏續飛光
搜窮力雖憊磨礪志須償譬如勤種藝無憂墮囷倉又如
導涓涓寧難致湯湯昔廢漸開闢新輪日收藏經營但壘
壘積累自穰穰既多又須擇儲精棄其糠一正以孔孟其
揮乃韓莊賓朋顧空館議論據方牀試爲出其有始知宮

應商紛紜遇叩擊律呂乃交相須臾極萬變開闔爭陰陽
南山對塵案和磨露青蒼百鳥聽徘徊忽如來鳳凰乃知
千載後坐可見虞唐施行雖未果貯蓄豈非良何殊廐中
馬縱斃艸滿塲形骸苟充實氣力易騰驤此求苦未晚此
志在堅剛

戲呈休文屯田

陳侯雋拔人所羨歲晚江湖初識面已開清論至更僕更
讀新詩欲焚硯天子無由熟姓名諸公固合思論薦烏驥
况已踏臺省黑綬未得辭州縣落落逢人愈難合欣欣願
我能忘倦跬步從官別經歲角中廣坐今相見遶郭青山
疊寒玉縈隄遠水鋪文練明紅靚白花千樹隔葉跳枝鶯

百轉佳時苦雨已蕭索落盡隨風還面旋縱無供帳出郊
野尚有清樽就閒燕脫遺拘檢任真率放恣嘲諧較豪健
東廊解榻不共語明日離亭空眷眷

麻姑山送南城尉羅君

麻姑之路摩青天蒼苔白石松風寒峭壁直上無攀援懸
磴十步九屈盤上有錦繡百頃之平田山中遺人耕紫烟
又有白玉萬仞之飛泉噴崖直瀉蛟龍淵豐堂廣殿何言
言階脚挿入斗牛間樛枝古木不記年空槎呀然卧道邊
幽花自嬋娟林深爲誰妍但見塵消境靜翔白鶴吟清猿
雛禽乳鹿往往呴荒顛却視來徑如緣絙千重萬疊窮巖
巒下有荆吳粟粒之羣山又有區園一撮之平川奕棋縱

衡遠近布城郭魚鱗參差高下分岡原千奇萬異可意得
墨筆盡禿誰能傳丈夫舒卷要宏達世路俯仰多拘牽偶
來到此醒心日便欲洗耳辭囂喧羅夫子一日遠補東南
官愛此層崖峻壑之秀發開軒把酒可縱觀喜此披霄挿
漢之竇起出門舉足得往還羅夫子一尉龍蛇方屈蟠此
邦人人衣食足闔境年年抱鼓閑几案剿裁得休暇山水
登躡遺紛煩我行送之思故園引領南望心長懸

東軒小飲呈坐中

二年委質繫官次一日偷眼看青山念隨薄祿困垂首似
見故人羞滿顏及門幸得二三友把酒能共頃刻閒海魚
腥鹽聊復進野果酸澁誰能刪談劇清風生塵柄氣酣落

日解醉銀瑰材壯志皆可喜自笑我拙何由攀高情坐使
鄙吝去病體頓覺神明還簡書皇皇奔走地筦庫碌碌塵
埃間功名難合若捕影日月遠易如循環不如飲酒不知
厭欲罷更起相牽扳

七月十四日韓持國直廬同觀山海經

高閣在清禁長軒憑廣虛御幄闕圖像依然臨幸餘翠壁
布天路黃簾分直廬一雨清景早稍涼秋興初解帶就君
坐臨牀闕素書山海所錯出飛潛類紛如此語果虛實遺
編空卷舒自笑正豕亥更微注蟲魚君材合遠用就此固
已疎如我乃斯幸地閑容誤屋竹影散良席花香浮廣裾
俯仰自足適歸時更當徐

秋聲

喬柯與長梗秀色故未晚秋風來吹之聲如振江海怒號
無晨夕唱和若有待寥寥徧坳窪豈獨緣蟲鬼百川亦相
投取鬧不知悔竹籬更譊然呂律焉足采蜩螗豈知微切
切如怨慙惟人亦吟哦沸若烹鼎鼎八荒同一鳴靜裏安
得在獨有虛空翁恬然故無改

戲書

家貧故不用籌算官冷又能無外憂交遊斷絕正當爾眠
飯安穩餘何求君不見黃金滿籬要心計大印如斗爲身
讎妻孥意氣賓客附往往主人先白頭

李節推亭子

肝江郭東門江水湛虛碧東南望羣峯連延倚天壁長林
相蔽虧蒼翠浮日夕青冥牕戶寒居者非咫尺子初得從
誰有此烟霧宅燕坐遠世喧及門無塵容築亭更求溪緩
帶聊自適時花笑婀娜山鳥吟格磔家釀熟新樽歡言命
良席故已輕華簪寧論珍拱壁我亦有菑田相望在阡陌
安得巾柴車過從從三益

過介甫

日暮驅馬去停鑣叩君門頗語肺腑盡不聞可否言淡爾
非外樂恬然忘世喧况值秋節應清風蕩歎煩徘徊望星
漢更復坐前軒

百花堤

如玉水中沙誰爲北湖路久翳荒艸根未承青霞步我爲
發其枉修營極幽趣髮直而砥平驂驅可馳驚周以百花
林繁香泫清露間以綠楊陰芳風轉朝暮飛梁憑太虛曉
榭躡烟霧直通高城顛海岱歸指顧爲州乏長材幸歲足
秔稌與衆飽而嬉陶然無外慕

送李樞赴舉

湖水碧槐花黃山川搖落牕戶涼宿雲星稀日東出青冥
風高雁南翔華堂昨夜讀書客匹馬今朝遊大梁鋒鏑拂
塵見飛影把握驚人持夜光康衢四闢通萬里天駟得地
方騰驤我畱東山意頗卓屏棄外慮無毫芒子能相從味
冲漠捉筌勿暫遲歸裝

送韓玉汝

春日賊東送韓玉汝赴兩浙轉運以池塘生春艸園柳變鳴禽爲韻得生字

野岸漲流水名園分雜英
旭景冠蓋集清談樽酒傾重此
臺省秀駕言江海行已喜懷抱粹
况推材實精衆許極高
遠時方藉經營詎止富中廩
固將澤東氓還當本朝用不
待芳歲更功名自茲始勿嘆華髮生

招隱寺

一徑入松下雨峯橫
馬前攀綠綠蘿磴飛步蒼崖顛
昔人此喜遯手弄朱絲絃
想當林間月獨寫山中泉
此樂非外得肯受世網牽
我亦本蕭散至此更怡然
偏憐最幽處流水鳴澗澗

漢廣亭

悠悠漢水長剡剡楚山密若與心目期爭從牕戶出太守
樸鄙人迂無適時術治民務不煩得意偷暇日北城最頻
高局促皆曠逸雲根辨毫芒鳥背臨律罕亦以樂賓遊豈
惟慰衰疾欲寄別後情嗟無少文筆

移守江西先寄潘延之節推

憶昔江西別子時我初折腰五斗粟南北相望十八年俯
仰飛光如轉燭子遺萬事遂恬曠我繫一官尚局促早衰
膽氣自然薄多病顛毛那更綠人情畦畛阻肝膈世路風
波悸心目每嗟太守兩朱輪寧及田家一黃犢幸逢懷綬
入斗牛喜得披山收寶玉薄材頑鈍待磨琢舊學搶攘期
反覆雲鴻可近眼先明野鹿尚縻顏自忸長鬚幸未阻誨

存下榻應容拜臨辱

鴻雁

江南岸邊江水平
水荇青青蒲綠鴻雁此時儔侶多
亂下沙汀恣樓宿
羣依青荇晏且鳴
暖浴蒲根戲相逐
長無矰繳意自閑
不飽稻粱心亦足
性殊凡鳥自知時
飛不亂行聊漸陸
豈同白鷺空潔白
俛啄腥汙期滿腹

訪石僊巖杜法師

杜君袖銜丹砂書
一顧訶斥百怪除
聲如翻河落天衢
四方爭迎走高車
方瞳秀貌垂白髮
買船東南尋舊居
石巖天開立精廬
四山波瀾勢爭趨
君琴一張酒一壺
笑談袞袞樂有餘
我今歸來尚踟蹰
羨君決發真丈夫

曉出

曉出城南羅卒乘皂纛采旗密相映貔貅距躍良家子鶴
鶴彌縫司馬令奪標一一飛步疾檠檠兩兩翻身勁霸上
今朝且兒戲衛青異日須天幸

送英州魏秘丞

遠民歌舞戴昇平碧閣朱樓照眼明鄉饌雨餘收白簟客
罇秋後對紅英龍鳴真水遙通海路入南山不隔城材術
如君有餘暇出遊應數擁雙旌

送陳郎中還京兼過九江新宅

艤舟金碧照溪沙帆上風吹五兩斜罷郡紫泥催向闕過
江紅旆引還家因將舊社人攜酒應喜新林樹見花莫作

山齋久留意中臺虛位有清華

遣興

背燈鬪鼠窺寒硯落月啼烏送迥笳江漢置身貧作客溪
山合眼夢還家百憂忽忽丹心破萬事悠悠兩鬢華誰與
健帆先度鳥更無畱滯向天涯

西亭

團扇頻揮到此亭他鄉愁坐思冥冥空羞避俗無高節轉
覺逢人惡獨醒歲月淹畱隨日老乾坤狼狽幾時寧欲知
事事今何似萬里波濤一點萍

盆池

環環清泚早猶淡栩栩芙蓉近可尋蒼壁巧藏天影入翠

奩微帶蘚痕侵能供水石三秋興不負江湖萬里心
照影獨憐身老去日添華髮已盈簪

羈遊

簞飯寒齏且自如欲將吾道付樵漁羈遊事事情懷惡
貧病年年故舊疎自古幸容元亮醉凡今誰喜子雲書
何由得洗塵埃盡恣買滄洲結艸廬

南軒竹

密竹娟娟數十莖半庭瀟灑有高情風吹已送煩心醒
雨洗還供遠眼清新筍巧穿苔石去碎陰微破粉牆生
應須萬物米霜後來看琅玕色轉明

照影亭

河流縈檻色輝輝無數幽禽入鏡飛已映渚花紅四出更
涵沙柳翠相圍不欺毫髮公雖有太盡妍蚩道恐非自笑
病容隨步見未衰華髮滿緇衣

贈彈琴者

至音淡薄誰曾賞古意飄零自可憐不似秦箏能合意滿
堂傾耳十三絃

寄孫正之

貌癯心苦氣飄飄長餓空林不可招能舉丘山惟筆力可
磨雲日是風標詩篇綴緝應千首學術窺尋豈一朝耳冷
高談經歲遠江南春動雪還消

簡翁都官

倦遊公府曳長裾笑上扁舟指舊廬自有文章真杞梓不
須雕琢是璠璵浮蛆滿甕嘗春酒垂露臨牕理素書況得
君賓同壯節一鄉清問更誰如

陳祁秀才園亭

眼無塵土境殊清一繞芳蹊病體輕烟樹疑從古画見水
軒真在碧天行君能極巧安山勢我欲忘歸聽竹聲只恐
主人難住此弟兄佳行滿鄉評

訓材叔江西道中作

枉渚荒源百里間艸根經燒舊痕乾入陂野水冬來淺對
樹諸峯雪後寒塢笛最宜風外聽嶺梅初得醉中看行尋
故交心無事不覺西遊道路難

閑行

艸軟沙勻野路晴竹枝烏帽稱閑行
烏啼綠樹穿花影風出青山送水聲
轉覺所憂非已事儘從多難見人情
閑中我樂人應笑忙處人爭我不爭

送撫州錢郎中

名郎元是足風流得郡東南地更幽
翠幕管絃三市晚画堂烟雨五峯秋
黃柑巧綴星垂檻香稻勻翻雪滿甌
應與謝公資健筆邦人才薄詎能酬

簡景山侍御

長年心事最相親一笑相疎忽數旬
柏府地嚴方許國芸臺官冷但容身
機腸漫竊公厨膳病髮難堪客舍塵
還有

鹿門棲宿興想君他日肯爲隣

遊天章寺

籃輿朝出踏輕塵拂面穆穆柳色新
曲水豈能畱往事南湖空解照人行
最宜靈運登山屐不負淵明漉酒巾
老去飄零心未折暫須同醉海邊春

送關彥遠

莫辭爲我百分飲從此送君千里行
物情簪屨尚須念人道交親那可輕
渚梅江柳弄佳色林鳥野蜂吟好聲
對之但醉餘可置明日此杯誰共傾

看花

春來日日揆花開紫陌看花始此回
欲賦妍華無健筆擬

酬芳景怕淡杯但知抖擻紅塵去莫問鬢鬢白髮催更老
風情應轉少且邀佳客試徘徊

會稽絕句三首送趙資政

花開日日去看花遲日猶嫌影易斜莫問會稽山外事但
將歌管醉流霞

花開日日插花歸酒盞歌喉處處隨不是心閒無此樂莫
教門外俗人知

年年穀雨愁春晚況是江湖兩鬢華欲載一樽乘興去不
知何處有殘花

送任達度支監商山崇福宮

漢陽門下士車騎幕中賓志節初皆壯風流久更新樞庭

承遠派郎位襲清塵雅淡琴聲古溫純玉性真詩書來射
策慈惠起臨人淮海褰帷久褰斜叱馭頻政平無橫吏刑
省絕寬民汴路揚旌出吳門擁節巡持權心似水待物氣
如春懋德垂承詔遺榮遽乞身行高寧繫俗道勝不憂貧
地絕分琳館西歸近紫宸鴻飛開羽翼驥逸露精神却理
烟霞宅重尋木石隣青嵩銷鶴怨碧落見鷗馴故友忻聯
壁諸儒慕塾巾學兼鴻寶異興與赤松親激勸留方冊驚
傳動縉紳浮雲雖抗意反席正逢辰祗恐尊廉退丁寧致
軟輪

過高士坊

蕭然絕世喧抗懷那肯就龍樊功名晚更爲餘事消

異初嘗出至言邪閣已空徐爾榻里人猶識鄭公門斯文
未喪如絲我後代當知李仲元

錢塘上元夜祥符寺陪咨臣郎中文燕席

月明如畫露華濃錦帳名郎笑語同金地夜寒消美酒玉
人春困倚東風紅雲燈火浮滄海碧水樓臺浸遠空白髮
蹉跎歡意少強顏猶入少年叢

寄鄆州邵資政

蒙問敝邑山水之景見索新詩
重意之辱謹吟二百字上寄

鉛筆讐書客朱幡守土臣素餐方側席黃髮已侵巾喜有
山園郭仍憐水滿津清華閑耳目蕭灑長精神秀色秋來
重寒聲雨後新宿雲依戶牖流月過松筠北圃分殊境西
湖斷俗塵渚花紅四出沙鳥翠相新芡老含珠寶魚驚躍

錦鱗飛梁凌宵杪虛榭壓喬淪嶺對橫修竹洲分抱白蘋
靜宜人事拙閑覺道腴真器小難周物官微幸庇身簿書
偷暇日杖屨想幽人泝險飛遊艇揆奇漾釣緝形縻甘鵲
怨心泰得鷗馴督府恩容久芳牋訊問頻門庭嚴衛戟尊
俎從華紳却起烟霞興還思水石鄰自嗤田父樂那可薦
鴻鈞

喜雪

雜雨零初急因風灑更狂英華傾月窟光氣瀉天潢宛轉
花飛密紆餘舞態長化財隨大小成器任圓方秀已滋山
國清先助水鄉色嚴齊上下明盛析毫芒潤屋情誇誕埋
輪典激昂收功歸澤物全德在包荒預喜倉箱富潛知海

嶽康蕭晨迎賀客歌吹趣傳觴

雪後同徐秘丞皇甫節推孔教授北園晚步

沙艸正黃瀕海意江梅還白故園情
猶除遠水春前急繞郭空山雪後明
林影易斜寒日短角聲吹去暮雲平
最慙佳客忘形契肯伴衰翁著屐行

憶越中梅

浣紗亭北小山梅蘭渚移來手自栽
今日舊林冰雪地冷香幽艷向誰開

冬夜卽事

印奩封罷閣鈴閑喜有秋毫免素餐
市粟易求倉廩實邑獫無警里閭安
香消一榻耽能暖月淡千門霧淞寒聞說

豐年從此始更回龍燭卷簾看齊寒甚夜氣如雪凝於木上旦起視之如雪日出飄滿階庭尤爲可愛齊人謂之霰霰諺曰霰重霽霰窮漢置飯甕以爲豐年之兆

西湖二首

左符千里走東方喜有西湖六月涼塞上馬歸終反覆泰山鴟飽正飛揚懶宜魚鳥心常靜老覺詩書味更長佇到平橋初見日滿川風露紫荷香

湖面平隨葦岸長碧天垂影入清光一川風露荷花曉六月蓬瀛燕坐涼滄海桴浮成曠蕩明河槎上更微茫何須辛苦求人外自有仙鄉在水鄉

早起赴行香

枕前聽盡小梅花起見中庭月未斜微破宿雲猶度鴈欲

淡烟柳已藏鴉井。鶯聲急。推寒玉。籠燭光繁秉。絳紗行到市橋人語密。馬頭依約對朝霞。

環波亭

水心還有拂雲堆。日日應須把酒杯。楊柳巧含烟景合芙蓉爭帶露華開。城頭山色相圍出。簷底波聲四面來。誰信瀛洲未歸去。兩州俱得小蓬萊。

鵲山亭

大亭孤起壓城顛。屋角峩峩插紫烟。潑水飛綃來野岸。鵲山浮黛入晴天。少陵騷雅今誰和。東海風流世謾傳。太守自吟還自笑。歸時乘月尚留連。

水香亭

臨池飛構鬱岩龔
檻檻無風影自搖
羣玉過林抽翠竹
雙虹垂岸跨平橋
頻依美藻魚爭餌
清見寒沙水滿橈
莫問荷花開幾曲
但知行處異香飄

靜化堂

修簷獻獻背成陰
行盡松篁一逕深
好鳥自飛還自下
白雲無事亦無心
客來但飲平原酒
衙退常攜靖節琴
世路人情方擾擾
一遊須抵萬黃金

凝香齋

每覺西齋景最幽
不知官是古諸侯
一尊風月身無事
千里耕桑歲有秋
雲水醒心鳴好鳥
玉沙清耳漱寒流
沉烟細細臨黃卷
疑在香爐最上頭

北渚亭

四檻虛敞地無隣
斷送孤高與使君
午夜坐臨滄海月
半天吟看泰山雲
青徐氣接川原秀
常碣風連艸木薰
莫笑一樽畱戀久
下階塵土便紛紛

芙蓉橋

鴈翅橫連杜若洲
碧欄干影在中流
蓬萊日日遊人到
誰道仙風解引舟

次道子中書問歸期

竊食東州歲未期
蓬萊人問幾時歸
凭闌到處臨清泚
開閣終朝對翠微
雨印每閑軍市靜
雙旌多偃送迎稀
一枝數粒身安穩
不羨雲鵬九萬飛

寄顧子敦

清曠亭邊雁欲回南湖分浪入城來空山過臘猶藏雪野
岸先春已放梅三徑未歸聊自適一尊尋勝每同開如今
試想長松下玉麈高談豈易陪

北園會客不飲

画橋南北水西東高下花枝綠間紅
帶得春風人盡醉獨醒誰似白頭翁

西湖納涼

問吾何處避炎蒸十頃西湖照眼明
魚戲一篙新浪滿鳥啼千步綠陰成
虹腰隱隱松橋出鶴首峩峩画舫行
最喜晚涼風月好紫荷香裏聽泉聲

喜雨

偶徇一官偷祿計，便懷千里長人憂。
桑間舉箔蠶初繭，隴上揮鎌麥已秋。
更喜風雷生北極，頓毆雲雨出靈湫。
從今菽粟非虛禱，會見隴畝果滿篝。

雨後環波亭次韻四首

次李秀才得魚字韻

候月已知星好雨，十年方喜夢維魚。
從今撥置亭中事，最喜西軒睡枕書。

次綰得風字韻

荷芰東西魚映菜，樵舟朝暮客乘風。
清泉雨後分毛髮，何必南湖是鏡中。

次維得禽字韻

黃蜀葵開收宿雨紫桑椹熟嚙新禽看花弄水非無事猶
勝紛紛別用心

次維得花字韻

丹杏一番收美實綠荷無數放新花西湖雨後清心目坐
到城頭泊曉鷗

到郡一年

薄材何幸擁朱軒竊食東風已一年隴上雨餘看麥秀桑
間日永問蠶眠官名雖冗身無累心事長閑地自偏祇恐
再期官滿去每來湖岸合留連

酬強幾聖

俯仰林泉繞舍清經年閒卧濟南城山田雨足心無事水
榭華開眼更明新霽烟雲飛觀出晚涼歌吹画橋橫寄聲
裴令樽前客祇欠高談一座傾

寄王樂道

荊州南走困塵埃應喜文章意自開明世正逢多事日要
塗須用出倫材不回霜雪天應惜未得風雲衆忍推若向
沙頭弔杜甫近詩懸望自書來

贈張濟

憶初蘭渚訪沉淪一畝蕭然里舍貧節行久窮彌好古文
章垂老更驚人詩書就我論新意冠劍投誰拂舊塵山驛
荒涼頗枉道一觴相屬莫嫌頻

趵突泉

一派遙從玉水分
暗來都灑歷山塵
滋榮冬茹溫常早
潤澤春茶采更真
已覺路傍行似鑑
最憐沙際涌如輪
曾城齊魯封疆會
況託娥英詫世人

北池小會

笑語從容酒慢巡
笙歌隨賞北池春
波閒鏤檻花迷眼
沙際朱橋柳拂人
金縷暗移泉溜急
銀簫相合鳥聲新
幸時無事須行樂
物外乾坤一點塵

寄孫莘老湖州墨妙亭

隆名盛位知難久
壯士碑豐亦易忘
棗木已非真篆刻
色絲空喜好文章
峴山漢水成虛擲
大厦深簷且秘藏
好事

今推雪溪守故開新館集琳瑯

華不注山

水經華不注山虎牙桀立孤峯特起青
峯巖望如點黛輿地志云亦名金輿山

虎牙千仞立巉巖峻拔遙臨濟水南翠嶺嫩嵐晴可掇金
輿陳迹久誰校高標特起青雲近壯士三周戰氣酣丑父
遺忠無處問空餘一掬野泉甘

和孔仲平

園池方喜共追尋正是槐榆夾路陰雙燭縱談樽酒淥一
枰消日紙牕深波濤萬字驚人筆塵土千鍾異俗心佳句
從來知寡和愧將沙礫報黃兼一作金

郡樓

滿眼青山更上樓偶攜閑客此閑遊飛花不盡隨風起野

水無邊帶雨流懷舊有情惟社燕忘機相得更沙鷗黃金
駟馬皆塵土莫靳當歡酒百甌

鮑山

雲中一點鮑山青東望能令兩眼明若道人心是矛戟山
中那得叔牙城

離齊州後

雲帆十幅順風行卧聽隨船白浪聲好在西湖波上月酒
醒還對紙牕明

文犀刻刻穿林筍翠橋田田出水荷正是西亭消暑日却
將離恨寄烟波

甘露寺多景樓

欲收佳景此樓中徙倚闌干四望通雲亂水光浮紫翠天
含山氣入青紅一川鐘唄淮南月萬里帆檣海外風老去
衣衿塵土在祇將心目羨冥鴻

彭城道中

百步洪聲潦退初白沙新岸奏舟車一時屠鉤英雄盡千
載河山戰伐餘楚漢舊歌流俚耳韓彭遺壁冠荒墟可憐
馬上縱橫畧只在邳橋一卷書

雨中王駕部席上

鳩鳴連日始成陰薄雨聊寬望歲心浴雁野塘新浪細藏
鴉宮柳嫩條淺春寒巧放花遲發人老嗟辭酒滿斟英雋
並遊知最幸名園偷暇更追尋

贈張伯常之郢見過因話荆楚故事仍貺佳什

一見心親十載前相望南北久茫然喜傾白髮論文酒重
訪清江下瀨船志大肯同悲抱璞識高寧許笑求田已闕
品藻傳荆楚更味陽春白雪篇

伯常少留別業寄詩索酒因以奉報

未擁雙騶謁漢庭暫留車馬憇林垞多情置驛邀佳客好
事磨鉛勘舊經芳艸連門三徑遠朝雲臨幌數峯青春膠
有禁無由寄誰爲江潭訪獨醒

贈黃降自宣城赴官許昌

所學從誰得最完豫章新出已難攀不搖聲利心能定欲
正畦淫手自刪穎水珠璣來席上郢城桃李任人間高齋

掛榻驪歌後坐守塵編少往還

招擇甫竹亭閑話

偶歸塞馬應何定粒食鷓鴣頗自安雲壓楚山春後雪風
吹襲水坐來寒詩豪已分材難強酒聖還諳量未寬賴有
佳賓堪下榻且將清話對檀欒

和鄭微之

故人客下榻清燕得傳杯地秀偏宜竹天寒未見梅雲林
千嶂出烟艇一帆開且醉休言別歸期信名催

送陳世修

沙渚鴻飛入楚雲遠林樵爨宿烟昏娟娟野菊經秋澹漠
漠滄江帶雨渾歸路賞心應駐節客亭離思暫聞樽莫嗟

問俗淹翔久從此頻繁不次恩

和張伯常峴山亭晚起元韻

揮手紅塵意浩然風興招客與扳聯
烟雲秀發春前地艸木清含雪後天
已卜耕桑臨富水暫拋魚鳥去伊川
更追羊杜經行樂况有風騷是謫仙

峴山亭置酒

石磴縈回入杳冥筠松高下簇虛亭
春歸野路梅初白雪盡沙田麥正青
馬窟飛雲臨畫棟鳳林斜日照疎櫺
長年酒量殊山簡却上籃輿恨獨醒

陳君式恭軒竹

不要牆頭俗眼看故開蒼蘚種檀欒
虛心得處從天性勁

節知來在歲寒葉養風烟誇酒美枝留冰雪送歌殘名郎
感慕同桑梓手植依然一畝寬

遊東山示客

虞寄庵餘蘚徑通滿山臺殿出青紅難逢堆案文書少偶
見凭欄笑語同梅粉巧含溪上雪柳黃微破日邊風從今
準擬頻行樂且作樽前白髮翁

大乘寺

行春門外是東山藍輦寧辭數往還溪上鹿隨人去遠洞
中花照水長閑樓臺勢出塵埃外鐘磬聲來縹緲間自笑
龕宮偷暇日暫攜妻子一開顏

上元

金鞍馳騁屬兒曹夜半宣闌意氣豪明月滿街流水遠
登入望衆星高風吹玉漏穿花急人近朱闌送目勞
自笑
佞心逐年少祇訝前事撚霜毛

元沙院

元字避聖祖諱

昇山南下一峯高上盡層軒未厭勞際海烟雲常慘淡
大寒松竹更蕭騷經臺日永銷香篆談席風生落塵毛
我亦有心從此得瑠璃瓶水照秋毫

酬柳國博

行止恂恂衆所褒東南佳譽映時髦洞無畦畛心常坦
凜若冰霜節最高朱紱少留居客左白頭難敵是詩豪
須知別後山城寺悵望歸艎送目勞

亂山

亂山淡處轉山多此地棲身奈遠何莫問吾親在何處舉

頭東所是新羅

福州際海東海卽新羅諸國圖經亦云長溪與外國接界

塞礪翁寄新茶

龍焙嘗茶第一人最憐溪岸兩旗新肯分方勝醒衰思應恐慵眠過一春

貢時天上雙龍去關處人間一水爭分得餘甘慰憔悴碾嘗終夜骨毛清

城南

雨過橫塘水滿堤亂山高下路東西一番桃李花開盡惟有青青艸色齊

西樓

海浪如雲去却回
北風吹起數聲雷
朱樓四面鉤疎箔
卧看千山急雨來

雪亳州

欲下蒼涼日全低
黯黯天飄颻
投夜急瑣碎得風儼
穢壤彌縫徧枯菱
點綴妍繁英
飛面旋艷舞起翩
躚已壓穿林竹
遠冰落澗泉
抵熾輕自肆
乘隙巧爭先
壅隔書郵斷
侵凌客履穿
恐傾貧巷屋
覺重泝溪船
帶有顏空妓
洵無質可鐫
包藏兼海岳
蒙蔽匝坤乾
枚叟招何晚
袁安卧正堅
會須逢見睨
萬里豁晴川

宋十五家詩選

東海陳訐輯

王安石

字介甫臨川人少善屬文曾舉擢示歐陽修
爲延舉登進士上第簽書淮南判官舊制秩
滿許獻文求試館職安石獨否再調知鄞通
判舒州以薦召試館職不就爲羣牧判官請
知常州移提點江東刑獄入爲度支判官嘉
祐三年上萬言書俄直集賢院明年同修起
居注知制誥糾察在京刑獄以母憂去終英
宗世召不起神宗在穎邸卽聞安石名及卽
位命知江寧府數月召爲翰林學士兼侍講
尋拜參知政事變行新法天下騷然罷爲觀
文殿大學士知江寧府旋自禮部侍郎超九
轉爲吏部尚書遂再相屢謝病罷爲鎮南軍
節度使同平章事判江寧府明年改集禧觀
使封舒國公元豐三年復拜左僕射觀文殿
大學士換特進改封荆哲宗立加司空卒贈
太傅諡曰文常居金陵自號半山詩有臨川
集

陳後山云王介甫以工蘇子瞻以新黃魯直以奇又云荆公文體數變暮年詩益工用意益苦黃山谷云公詩暮年方妙然學二謝失於巧耳葉少蘊云王荆公晚年詩律尤精嚴造語用字間不容髮然意與言會言隨意遣渾然天成殆不見有牽率排比處又云荆公少以意氣自許故詩語惟其所向不復更爲含蓄晚年始盡淡婉不迫之趣唐子西云荆公詩得子美句法楊誠齋云五七絕句難工惟晚唐介甫最工於此半山學少陵其瘦硬處別自擅長

元豐行示德逢

四山脩脩映赤日出背坼如龜兆出湖陰先生坐艸室看
踏溝車望秋實雷蟠電掣雲滔滔夜半載雨輪亭臯旱禾
秀發埋牛尻豆死更蕪肥莢毛倒持龍骨挂屋放買酒澆
客追前勞三年五穀賤如水今見西成復如此元豐聖人

與天通千秋萬歲與此同先生在野故不窮擊壤至老歌
元豐

純甫出釋惠崇畫要予作詩

畫史紛紛何足數惠崇晚出吾最許早雲六月漲林莽移
我修然墮洲渚黃蘆低推雪翳土鳬鴈靜立將儔侶往時
所歷今在眼沙平水澹西江浦暮氣沉舟暗魚苦歛眠嘔
軋如聞榜頗疑道人三昧力異域山川能斷取方諸承水
調幻藥灑落生綃變寒暑金坡巨然山數堵粉墨空多真
漫與大梁崔白亦善畫曾見桃花淨初吐酒酣弄筆起春
風便恐漂零作紅雨鴛流揆枝婉欲語蜜蜂掇藥隨翅股
一時二子皆絕藝裘馬穿羸久羈旅華堂豈惜萬黃金苦

道今人不如古

已未耿天鵬著竹白鳥江來予逆沈氏妹於白鷺洲

遇雪作此詩寄天鵬

辛酉冬天鵬復來誦之遂書於壁請天鵬書所酬於右

朔風積夜雪明發洲渚淨開門望鍾山松石皓相映故人
過我宿未盡躋攀興而我方渺然長波一歸艇欸段庶可
策柴荆當未暝與子出東岡牆西掃新徑

示元度

營居牛山園作

今年鍾山南隨分作園囿鑿池構吾廬碧水寒可澈清西
雇丁壯擔土爲培塿扶疎三百株蒔揀最高茂不求鸛鵲
實但取易成就中空一丈地斬木令結構五楹東都來廝
以遶簷溜老來厭世語淡卧寒門賣贖魚與之游倭鳥見

如舊獨當邀之子商畧終宇宙更待春日長黃鸝弄清晝

仲明父不至

張名軒民仲明父其父也

月出映溝城烟升隱墟落寒魚占窟聚暝鳥投枝泊亭臯
閑晚市隴首歸新穫竹子終不來青燈耿林壑

春日晚行

門前楊柳二三月枝條綠烟花白雪呼童羈我果下騶欲
尋南岡一散愁綠岡初日溝港淨與我門前綠相映隔淮
仍見裊裊垂佇立招懷去年時杏花園西光宅路艸暖沙
晴正好渡典盡無人楫迎我却隨倦鷗歸薄暮

移桃花示俞秀老

舍南舍北皆種桃東

一吹數尺高枝柯蔦綿花爛熳美

錦千兩數亭臯晴溝漲春綠周遭俯視紅影移漁舸山前
邂逅武陵客水際髣髴秦人逃攀條弄芳畏晚晚已見黍
雪盤中毛仙人愛杏令虎守百年終屬樵蘓手我哀此果
復易朽蟲來食根那得久瑤池紺絕誰見有更人花時且
追酒君來醅酏相隨否

獨歸

鍾山獨歸雨微暝稻畦夾岡半黃青疲農心知水未足看
雲倚木車不停悲哉作勞亦已久暮歌如哭難爲聽而我
官閑幸無事北牕枕簟風泠泠於時荷花擁翠盞細浪嫋
雪千娉婷誰能飲眼共此樂秋港雖淺可揚舲

獨卧有懷

午鳩鳴春陰獨卧林壑靜微雲過一雨浙瀝生晚聽紅綠
紛在眼流芳與時競有懷無與言佇立鍾山暝

車載板

荒哉我中園珍果所不產朝暮惟有鳥自呼車載板楚人
聞此聲莫有笑而莞而我更歌呼與之相往返視遇若搏
黍好音而睨睨攘攘生死夢久知無所揀物弊則歸土吾
歸其不晚歸歟汝隨我可相蒿里挽

次韻舍弟江上

岸紅歸欲稠渚綠合猶晚晴沙上屐輕暖水隨帆遠吹波
戲魚動掠葉飛禽返著意覓幽蹊桃花悞劉阮

明妃曲二首

明妃初出漢宮時淚溼春風鬢脚垂低徊顧影無顏色尚
得君王不自持歸來却怪丹青手入眼平生幾曾有
意態由來畫不成當時枉殺毛延壽一去心知更不歸可憐著
盡漢宮衣寄聲欲問塞南事只有年年鴻鴈飛家人萬里
傳消息好在羶城莫相憶君不見咫尺長門閉阿嬌人生
失意無南北

明妃初嫁與胡兒羶車百兩皆胡姬含情欲說獨無處傳
與琵琶心自知黃金捍撥春風手彈看飛鴻勸胡酒漢宮
侍女暗垂淚沙上行人却回首漢恩自淺胡自深人生樂
在相知心可憐青冢已蕪沒尚有哀絃留至今

桃源行

望夷宮中鹿爲馬秦人半死長城下避時不獨商山翁亦
有桃源種桃者此來種桃經幾春採花食實枝爲薪兒孫
生長與世隔雖有父子無君臣漁郎漾舟迷遠近花間相
見因相問世上那知古有秦山中豈料今爲晉聞道長安
吹戰塵春風回首一霑巾重華一去寧復得天下紛紛經
幾秦

虎圖

壯哉非熊亦非羆目光夾鏡當坐隅橫行委尾不畏逐顧
盼欲去仍躊躇卒然我見心爲動熟視稍稍摩其鬚固知
譚者巧爲此此物安肯來庭除想當槃礴欲畫時睥睨衆
史如庸奴神閑意定始一掃功與造化論錙銖悲風颭颭

吹黃蘆上有黃雀驚相呼槎牙死樹鳴老烏向之俛囁如
哺鵲山牆野壁黃昏後馮婦遙看亦下車

和冲卿雪詩并示持國

地卷江海浮天吹河漢湧北風散作花巧麗世無種霾昏
得照曜塵滓歸掩擁荒林無空枝幽瓦有高隴分纔一毛
細聚戩千鈞重飛颺窺已眩摧壓聽還克漁舟平繫舷樵
櫓沒歸踵空令物象瑩豈免川塗壅爭光姮娥妬失色義
和恐賴逢陽氣蒸轉作水波溶舞庭稱賀嚴掃路傳呼龍
衝遊謝壯少避卧甘閑冗吳侯絕俗唱韓子當敵勇勝負
觀兩豪吾衰但陰拱

白溝行

白溝河邊蕃塞地送迎蕃使年年事蕃使常來射狐兔漢
兵不道傳烽燧萬里鉏耰接塞垣幽燕桑葉暗川原棘門
潮上徒兒戲李牧廉頗莫更論

別謝師宰

閭闔城西地如水鷄鳴黃塵波浪起窮年一馬望扶桑東
得省門身輒止薄書期會老紛紛邂逅論心喜有君數日
未多還捨我相看愁思亂於雲

送程公闢守洪州

畫船插幟搖秋光鳴鐃傳鼓水洋洋豫章太守吳郡郎行
指斗牛先過鄉鄉人出郭航酒漿烹鰲鱠魚炊稻梁茨頭
肥大菱腰長醕醕喧呼坐滿牀怪君三年滯瞿塘又驅傳

馬登大行纓旄脫盡歸大梁翻然出走天南疆九江左投
貢與章揚濶吹漂浩無旁老蛟戲水風助狂盤渦忽圻千
丈強君聞此語悲慨慷慨迎吏乃前持一觴鄱州歷選多儒
良鎮撫時有諸侯王拂天高閣朱鳥翔西山蟠繞鱗鬣蒼
下視城堊真金湯雄樓傑屋鬱相望中戶尚有千金藏漂
田種秔出壤壤沉檀珠犀雜萬商大舟如山起牙檣一本無此
一輪瀉交廣流荆揚輕裙利屐列名倡春風蹋謠能斷腸
平湖灣鳥烟渺茫樹石珍怪花艸香幽處往往聞笙簧地
靈人秀古所臧勝兵可使酒可嘗十州將吏隨低昂談笑
指麾回雨暘非君才高力方剛豈能跨有此一方無爲聽
客欲霑棠使君謝吏趣治裝我行樂矣未渠央

書任邨馬鋪

兒童繫馬黃河曲近坼河流如可掬任邨炊米朝食魚日暮榮陽驛中宿投老經過身獨在當時洲渚今平陸秣黍冥冥十數家仰視荒蹊但喬木氷盤羹美客自知起看白水還東馳爾來百口皆年少歸與何人共此悲

葛蘊作巫山高愛其飄逸因亦作兩篇

巫山高十二峯上有往來飄忽之援猱下有出沒灩澦之蛟龍中有倚薄縹緲之神宮神人處于冰雪容吸風飲露虛無中千秋寂寞無人逢邂逅乃與襄王通丹崖碧嶂深重重白月如日明房櫳象牀玉几來自從錦屏翠幔金芙蓉陽臺美人多楚語祇有纖腰能楚舞爭吹鳳管鳴鼉鼓

那知襄王夢時事但見朝朝暮暮長雲雨

巫山高偃薄江水之滔滔水於天下實至險山亦起伏爲
波濤其巔冥冥不可見嵯岈斗絕悲猿狖赤楓青櫟生滿
谷山鬼白日樵人遭窈窕陽臺彼神女朝朝暮暮能雲雨
以雲爲衣月爲褚乘光服暗無留阻崑崙曾城道可取方
丈蓬萊多伴侶塊獨守此嗟何求況乃低徊夢中語

送李宣叔倅漳州

關山到漳窮地與南越錯山川鬱霧毒瘴癘春冬作荒茅
篁竹閒蔽虧有城郭居人特鮮少市井宜蕭索野花開無
時蠻酒持可酌窮年不用客誰與分杯杓朝廷尚賢俊磊
砢充臺閣君能喜節行文藝又該博超然萬里去識者爲

不樂予聞君子居自可救民瘼苟能禦外物得地無美惡
似聞最南方北客今勿藥林麓換風氣獸蛇凋毒蠹如瘴
猶近州氣冷又銷鑠珍足海物味甚厚不爲薄章舉馬甲
枉固已輕羊酪蕉黃荔子丹又勝楂梨酢逢衣比多士往
往在丘壑從容與笑語豈不慰寂寞太守好觴詠嘉賓應
在幕想卽有新詩流傳至京洛

和劉貢甫燕集之作

馮侯天馬壯不羈韓侯白鷺下青池劉侯羽翰秋欲擊吳
侯葩萼春爭披沈侯玉雪照人紫蕭灑已見江湖姿惟予
貌醜駭公等自鏡亦正如蒙俱忘形論交喜有得杯酒避
近今良時心親不復異新舊便脫巾屢相諧嬉空堂無塵

小雨定濃綠翳水浮秋曦高談四坐掃炎熱木末更送涼
風吹此歡不盡忽分散明月照屋空參差平明餘清在心
耳洗我重得劉侯時劉侯未見聞已熟吾友稱誦多文辭
才高意大方用世自有豪俊相攀追咨子後會恐不數魂
夢久向東南馳何時扁舟却顧我還欲迎子遊山陂

寄王逢原

北風吹雲埋九垓艸木零落空池臺六龍避逃不敢出地
上獨有寒崔嵬披衣起行愁不慙歸坐把卷闔且開永懷
古人今已矣感此近世何爲哉中韓百家熱火起孔子大
道寒於灰儒衣紛紛欲滿地無復風焰空煤炰力排異端
誰助我憶見夫子真奇才梗枻豫章檣白日祇要匠石聊

穿裁我方官拘不得往子有閑暇宜能來晤言相與入聖處一取萬古光芒迴

送裴如晦卽席分題二首

以黯然消魂惟別而已爲韻擬而惟字韻作

飄然五湖長昨日園子師綠髮約畧白青衫欲成緇牽舟推河水去與山水期春風垂虹亭一杯湖上持傲兀何賓客兩忘我與而能復記此飲詩成酒淋漓

十月欸水冰問君行何爲行不顧斗米自與五湖期平生湖上遊幽事畧能知此後君最樂窮年得遊嬉彩鯨抗波濤風作鱗之而鳴鼓上洞庭笑看紅橘垂漠漠大梁下黃沙吹酒旗應憐故人愁回首一相思

陰山畫虎圖

陰山健兒鞭靽急走勢能追北風及透迤一虎出馬前白
羽橫穿更人立回旗倒戟四邊動抽矢當前放蹄入爪牙
蹭蹬不得施磧上流丹看來溼胡天朔漠殺氣高烟雲萬
里埋中刀窮廬無工可貌此漢使自解丹青包堂上絹素
開欲裂一見猶能動毛髮低徊使我思古人鉗地搏兵走
戎羯禽逃獸遁亦蕭然豈若封疆今晏眠契丹弋獵漢耕
作飛將自老南山邊還能射虎隨少年

杜甫畫像

吾觀少陵詩爲與元氣侔力能排天幹九地壯顏毅色不
可求浩蕩八極中生物豈不稠醜妍巨細千萬殊竟莫見
以何雕鏤惜哉命之窮顛倒不見收青衫老更斥餓走半

九州瘦妻餓前子仆後攘攘盜賊森戈矛吟哦當此時不
廢朝廷憂常願天子聖大臣各伊周寧令吾廬獨破受凍
死不忍四海寒飈飈傷屯悼屈止一身嗟時之人死所羞
所以見公書再拜涕泗流惟公之心古亦少願起公死從
之游

哭梅聖俞

詩行於世先春秋國風變衰始柏舟文辭感激多所憂律
呂尚可諧鳴球先王澤竭士已偷紛紛作者始可羞其聲
與節急以浮真人當天施再流篤生梅公應時求頌歌文
武功業優經奇緯麗散九州衆皆少銳老則不翁獨辛苦
不能休惜無采者人名道貴人憐公青兩眸吹噓可使高

岑樓坐令隱約不見收空能乞錢助饋餽疑此有物司諸
幽棲棲孔孟葬魯鄒後始卓犖稱軻丘聖賢與命相脗矛
勢欲強達誠無由詩人況又多窮愁李杜亦不爲公侯公
窺窮阨以身投坎壈坐老當誰尤吁嗟豈卽非善謀虎豹
雖死皮終留飄然載喪下陰溝粉書軸幅懸無旒高堂萬
里哀白頭東望使我商聲謳

雲山詩送正之

雲山參差碧相圍溪水詰曲帶城陴溪窮壤斷至者誰予
獨與子相諧熙山城之西鼓吹悲水風蕭蕭不滿旗子今
去此來無時予有不可誰子規

別孫莘老

逢原未熟我已與子相知自吾得逢原知子更不疑把手
湖上舟望子欲歸時茫然乃分散獨背東南馳寥寥西城
居邂逅與子期鷄鳴入省門朱墨來紛披含意不自得強
顏聊爾爲會合常在夜青燈照書詩往往並衾語至明不
言疲匆匆捨我去使我當從誰送子不出門我身方羈縻
我心得自如今與子相隨隨子至湖上逢原所嘗嬉想見
荷葉盡北風卷寒漪已懷今日愁更念昔日悲相逢亦何
有但有鏡中絲

獨山梅花

獨山梅花何所似半開半謝荆棘中美人零落依艸木志
士顛顛守蒿蓬亭亭孤艷帶寒日漠漠遠香隨野風移栽

不得根欲老回首上林顏色空

牧笛

綠艸無端倪牛羊在平地茅綿杏靄間落日一橫吹迢遙
送逸響澶漫寫真意豈比賣飴人吹簫販童穉

送董伯懿歸吉州

我來以喪歸君至因謫徙蒼黃憂患中邂逅過於此去年
服初除聽敕相助喜看君數歸月但屈兩三指茫然冬更
秋一笑非願始籃輿楊柳下明月芙蓉水僮僕屢闕門客
罷方隱几是非評衆詩成敗斷前史時時對奕石漫浪爭
生死送迎皆幅巾設食但陳米亦曾戲篇章揮翰疾蒿矢
君豪才有餘我老憊先止東城景陽陌南望長干紫欲斲

三畝蔬於焉寄殘齒經過許後日唱和猶在耳新恩忽捨
我欣悵生彼已江湖北風帆換施卽千里相逢知何時莫
惜縑與紙

八月十九日試院夢冲卿

空庭得秋長漫漫寒露入幕愁衣單喧喧人語已成市白
日未到扶桑間永懷所好卻成夢玉色勞髴開心顏逆知
後應不復隔談笑明月相與閒

過食新城藕

他年過食新城藕枕藉船中載親友今年却到經行處獨
坐昏烟對舞柳甘酸向口無所適牢落盤餐與樽酒米房
玉節漫自好欲御還休涕垂手曾參宦學居常近陽城離

別初不久人間此願兩未能西風落日空回首

荅裴煜道中見寄

君遊苦數歸苦晚一驛險有千里遠知君陟降旦暮間馬
力不勁厭長坂雨脚墜地花枝低風頭入溪蒲葉偃此處
登臨不奈愁瓊樹森森遮疊巘

和中甫兄春日有感

雪釋沙輕馬蹄疾北城可遊今暇日濺濺溪谷水亂流漠
漠郊原艸爭出嬌梅過雨吹爛熳幽鳥迎陽語啾唧分香
欲滿錦樹園剪綵休開寶刀室胡爲我輩坐自苦不念茲
時去如失飽開高逕動車輪甘卧空堂守經帙淮蝗蔽天
農久餓越卒圍城盜少逸至尊溪拱罷簫韶元老相看進

刀筆春風生物尚有意壯士憂民豈無術不成歡醉但悲歌回首功名古難必

到郡與同官

時倅舒州

瀉碧沄沄橫帶郭浮蒼靄靄遙連閣艸木猶疑夏鬱葱風雲已見秋蕭索荒歌野舞同醉醒水果山肴互酬酢自嫌多病少歡顏獨負嘉賓此時樂

既別羊王二君與同官會飲於城南因成寄

用藥名

赤車使者白頭翁常歸入見天門冬與山久別悲忽忽澤瀉半天河漢空羊王不留行薄晚酒肉從容追路遠臨流黃昏席未卷玉盞倒盡黃金盞羅列當辭更繼繼預知子不空青眼嚴徐長卿誤推挽老年揮翰天子苑送車陸續

隨子返坐聽城鷄腸宛轉

九井

得盈字

泝崖涉澗三十里高下犖确無人耕捫蘿挽蒿到山趾仰
見吹瀉何崢嶸餘聲投林欲風雨末勢卷土猶溪阮飛蟲
凌兢走獸慄霜雪夏落雷冬鳴野人往往見神物鱗甲漠
漠雲隨行我來立久無所得空數石上菖蒲生中官繫龍
沉玉冊小吏磔狗澆銀觥地形偶爾藏險怪天意未必司
陰晴山川在理有崩竭丘壑自古相虛盈誰能保此千世
後天柱不折泉常傾

寄題衆樂亭

陵陽游觀吾所好恨不卽過衆樂亭
嘗聞鬚髯如夢寐吟

筆自欲圖丹青千峯秀出百里外忽於其上崢嶸楹朝雲
嘘咄日暖暖夜水落澗風泠泠春花窈窕鳥爭舞夏木蔭
鬱猿哀鳴潦收葉落天地爽海月影到山川明籃輿晨出
誰與適坐與萬物觀虛盈令思民事不忍後田間笑語催
蠶耕吏休歸舍獄訟少墟落飲酒欲秋成惟愁一日奪令
去出來老稚交逢迎彼民安知方祿仕徒喜使我寬逋征
令知道義士林服遺愛豈用吾詩評

書會別亭

西城路居人送客西歸處年年借問去何時今日扁舟從
此去春風吹花落高枝飛來飛去不自知路上行人亦如
此應有重來此處時

泊舟姑蘇

朝遊盤門東暮出閶門西四顧茫無人但見白日低荒林
帶昏烟上有歸鳥啼物皆得所託而我無安棲

贈曾子固

曾子文章衆無有水之江漢星之斗挾才乘氣不媚柔羣
兒謗傷均一口吾語羣兒勿謗傷豈有曾子終皇皇借令
不幸賤且死後日猶爲班與楊

杭州修廣師法喜堂

浮屠之法與世殊洗滌萬事求空虛師心以此不挂物一
堂收身自有餘堂陰置石雙磴嶮石脚立竹青扶疎一來
已覺肝膽豁況乃宴坐窮朝晡憶初救時勇自許壯大看

俗尤崎嶇豐車肥馬載豪傑少得志願多憂虞始知進退
各有理造次未可分貧愚會將築室返耕釣相與此處吟
山湖

復至曹娥堰寄剡縣丁元珍

溪水渾渾來自北千山抱水清相射山溪水急無艇子欲
從故人安可得故人昔日此水上罇酒扁舟慰行役津亭
把手坐一笑我喜滿懷君動色論新講舊惜未足落日低
徊已催客離心自醉不復飲秋果寒花空滿席今年却坐
相逢處悵悵難求別時迹可憐溪水自南流安得溪船問
消息

欣會亭

數家鄰水竹一塢共雲林晚食靜適已獨謐欣會心移牀
隨漫興操笑取幽尋未愛神錐汝猶憐妙斲琴

歌眠

翠幙卷東岡歌眠月半牀松聲悲永夜荷氣馥初涼清話
非無寄幽期故不忘扁舟亦在眼終自懶衣裳

露坐

露坐看溝月飄然風度荷珠跳散作點金湧合成波老失
芳歲易靜知良夜多陵秋久不寐吾樂豈絃歌

晝寢

甲子四月十七日午時作

井逕從蕪漫青藜亦倦扶百年惟有且萬事總無如棄置
蕉中鹿驅除屋上烏獨眠牕日午往往夢華胥

次韻昌叔歲暮

城雲漏日晚樹凍裂春淡綠密魚雖暖巢危鶴更陰橫風
高曠弩殘溜細鳴琴歲換兒童喜還傷老大心

壬辰寒日

客思似楊柳春風千萬條更傾寒食淚欲漲冷城潮巾髮
雪爭出鏡顏朱早雕未知軒冕樂但欲老漁樵

春日

冉冉春行暮菲菲物競率鴛鴦猶求舊友鷺不肯貧家室有
賢人酒門無長者車醉眠聊自適歸夢到天涯

江亭晚眺

日下崦嵫外秋生沆碭間清江無限好白鳥不勝閑雨過

雲收嶺天空月上灣歸鞍侵調角回首六朝山

送孫子高

蕩漾江南客融怡席上珍一罇相別酒千里獨歸人客路
貧堪病交情遠更親自慙兒女意失淚滴衣巾

自白上邨入北寺

雨過百泉出秋聲連衆山獨尋飛鳥外時渡亂流間坐石
偶成歇看雲相與還會須營一畝長此聽潺湲

遊杭州聖果寺

登高見山水身在水中央下視樓臺處空多樹木蒼浮雲
連海氣落日動湖光偶坐吹橫笛殘聲入富陽

次韻致遠木人洲一首

迷子山前漲一洲，木人圖志失編收。
年多但有柳生肘，地僻獨無茅蓋頭。
河側鮑生乾尚立，江邊屈子槁將投。
未妨他日稱居士，能使君疑福可求。

次韻酬龔溪甫

握手東岡雪滿簷，後期惆悵老吳蠶。
芳辰一笑真難值，暮齒相思豈久堪。
他日杜詩傳渭北，幾時周宅對漳南。
百年邂逅能多少，且可勤來共草菴。

次韻酬朱昌叔

烏榜登臨興未休，共言何許更消憂。
聯裾蕭寺尋真覺，方駕孫陵弔仲謀。
語罷每開歡笑口，詩來仍掉苦吟頭。
已知軒冕真吾累，且可追隨馬少游。

登寶公塔

倦童疲馬放松門自把長筇倚石根
江月轉空爲白晝嶺雲分暝與黃昏
鼠搖岑寂聲隨起鴉矯荒寒影對翻
當此不知誰客主道人忘我我忘言

紙暖閣

聯屏葢障一尋方南設鈎簾北置牀
側座對敷紅絮暖仰牕分啟碧紗涼
鑪廬易以梅烝壞錦幄終於艸野妨
楚穀越藤真自稱每糊因得減書囊

雨花臺

盤互長干有絕陁井包佳麗入江亭
新霜浦溆綿綿淨薄晚林巒往往青
南上欲窮牛渚怪北尋難忘艸堂靈
便輿

却走垂楊陌已戴寒雲一兩星

示俞秀老

繚繞山如涌翠波人家一半在烟蘿時豐笑語春聲早地
僻追尋野興多窄堵朱甍開北向招提素脊隱西阿暮年
要與君攜手處處相煩作好歌

讀眉山集次韻雪詩

若木昏昏未有鴟凍雷淡閉阿香車搏雲忽散徒爲屑翦
水如分綴作花旌簪尚憐南北巷持杯能喜兩三家戲按
弄掬輪兒女羔袖龍鍾手獨叉

戲搖微縞女鬟鴟試咀流酥已煩車歷亂稍埋冰揉粟消
沉時點水圓花豈能解艤真尋我且與蝸牛獨卧家欲挑

青腰還不敢直須詩膽付劉叉

次韻東廳韓侍郎齋居晚興

齋禁雖嚴異太常蕭然高卧意何長烟含欲暝宮庭紫日
映新秋省闈黃壯節易摧行踽踽華年相背去堂堂追樊
坐歎風塵隔空聽鈞天夢帝鄉

崇政殿詳定幕次偶題

嬌雲漠漠護層軒嫩水濺濺不見源禁柳萬條金細撚宮
花一段錦新翻身閑始更知春樂地廣還同避世喧不恨
玉盤冰未賜清談終日自蠲煩

詳定試卷二首

簾垂咫尺斷經過把卷空聞笑語多論衆勢難專可否法

嚴人更謹誰何文章直使有無類勲業安能保不磨疑有
高鴻在寥廓未應迴首顧張羅

童子常誇作賦工暮年羞悔有楊雄當時賜帛倡優等今
日論才將相中細甚客卿因筆墨卑於爾雅注魚蟲漢家
故事真當改新詠知君勝弱翁

奉酬楊樂道

邂逅聯裾殿閣春却愁容易卽離羣相知不必因相識所
得如今過所聞近代聲名出盧駱前朝筆墨數淵雲與公
家世山來事愧我初無百分

夜讀試卷呈君實待制景仁內翰

篝燈時見語驚人便覺揮毫捷有神學問比來多可喜文

章非特巧爭新蕉中得鹿初疑夢牖下窺龍稍眩真邂逅
兩賢時所服坐令孤朽得相因

次韻酬府推仲通學士雪中見寄

朝來看雪詠君詩想見朱衣在赤墀爲問火城將策試何
如雲屋聽廳知曲牆稍覺茨來密窮巷終憐掃去遲欲訪
故人非興盡白緣無路得傳卮

次韻張子野竹林寺二首

澗水橫斜石路深水源窮處有叢林青鴛幾世開蘭若黃
鶴當年瑞卯金敗壁數峯連粉墨涼烟一穗起檀沈十年
親友半零落回首舊遊成古今

京峴城南隱映溪兩牛鳴地得禪林風泉咽屋撞哀玉竹

月緣堦貼碎金藻井仰窺塵漠漠青燈對宿夜沈沈扁舟
過客十年事一夢此山愁至今

送李質夫之陝府

平世求才漫至公悠悠羈旅事多窮十年見子尚短褐千
里隨人今北風戶外屢貧虛自滿樽中酒賤亦常空共嫌
欲老無機械心事還能與我同

示長安君

少年離別意非輕老去相逢亦愴情艸艸杯盤供笑語昏
昏燈火話平生自憐湖海三年隔又作塵沙萬里行欲問
後期何日是寄書應見鴈南征

和祖仁晚過集禧觀

妍暖聊隨馬首東春衫猶未著方空烟霞送色歸瑤水山
木分香繞閭風壯髮已輸塵外綠衰顏漫到酒邊紅日斜
歸去人間世却記前遊似夢中

和王微之秋浦望齊山感李太白杜牧之

齊山置酒菊花開秋浦聞猿江上哀此地流傳空筆墨昔
人埋沒已蒿萊平生志業無高論末世篇章有逸才尚得
使君驅五馬與尋陳迹久徘徊

李君弔弟訪別長蘆至淮陰追寄

怒水憑風雪壘高亂流追我祇漁舸忽看淮月臨寒食想
映江春聽伯勞道義當成麟一角文章已禿兔千毫後生
可畏吾知子南北何時見兩髦

示董伯懿

穿橋度壑祗閑行詠石嘲花亦漫成
嚼蠟已能忘世味畫脂那更惜時名
長千里北寒山紫白下門西野水明
此地一座須卜築故人他日訪柴荆

和文淑湓浦見寄

多難漂零歲月賒空餘文墨舊生涯
相看楚越常千里不及朱陳似一家
髮爲感傷無翠葆眼從瞻望有玄花
惟詩與我寬愁病報爾何妨賦棣華

次韻吳季野再見寄

衣裘南北弊風塵志氣卑汙已累親
流俗尚疑身察察交遊方笑黨顛顛
遠同魚樂思濠上老使鷗鶩恥海濱
邂逅

得君還恨晚能明吾意久無人

次韻和甫詠雪

奔走風雲四面來坐看山壘玉崔嵬平治險穢非無德潤
澤焦枯是有才勢合便疑包地盡功成終欲放春回寒鄉
不念豐年瑞只憶青天萬里開

次韻徐仲元詠梅

溪杏山桃欲占新高梅放蘂尚嬌春額黃映日明飛燕肌
粉含風冷太真玉笛悲涼吹易散冰純生澀齧難親爭妍
喜有君詩在老我一作我老脩然敢效顰

不到太初兄所居遂已十年以詩攀寄

一水衣巾翦翠綃九峯環佩刻青瑤生才故有山川氣卜

築兼無市井囂三葉素風門閥在十年陳迹履綦銷歸榮
早晚重攜手莫負幽人久見招

偶成

懷抱難開醉易醒曉歌悲壯動秋城年光斷送朱顏去世
事栽培白髮生三畝未成幽處宅一身還逐衆人行可憐
蝸角能多少獨與區區觸事爭

季春上旬苑中卽事

輦路行看斗柄東簾垂殿閣轉春風樹林隱翳燈含霧河
漢欹斜月墜空新蕊漫知紅簌簌舊山常夢直叢叢賞心
樂事須年少老去應無日再中

與微之同賦梅花得香字三首

漢宮嬌額半塗黃
粉色凌寒透薄粧
好借月魂來映燭
恐隨春夢去飛揚
風亭把盞酬孤艷
雪徑回輿認暗香
不爲調羹應結子
直須畱此占年芳

結子非貪鼎
鄒嘗偶先紅杏
占年芳從教臘雪埋
藏得却怕春風漏洩
香不御鉛華知國色
祇栽雲縷想仙裳
少陵爲爾牽詩興
可是無心賦海棠

淺淺池塘短短牆
年年爲爾惜流芳
向人自有無言意
傾國天教抵死香
鬚裊黃金危欲墮
帶團紅蠟巧能裝
嬋娟一種如冰雪
依倚春風笑野棠

牆西樹

牆西高樹結陰稠
步屣窮年向北留
白日屢移催我老
清

風一至使人愁紛紛
暝鳥驚還合渺渺涼蟬咽欲休回首
舊林歸未得看看知復幾春秋

送僧無惑歸鄱陽

晚扶衰憊寄人間
應接紛紛祇強顏
挂席每諳東滙水
採芝多夢舊遊山
故人獨往今爲樂
何日相隨我亦閑
歸見江東諸父老
爲言飛鳥會知還

送遜師歸舒州

山川相對一悲翁
往事紛紛夢寐中
邂逅故人恩意在
低徊今日笑言同
看吹陌上楊花滿
忽憶巖前蕙帳空
亦見桐鄉諸父老
爲傳衰颯病春風

寄育王大覺禪師

單已安那示入禪艸堂難望故依然山今歲暮終岑寂人
更天寒最靜便隱蹟亦知甘自足憑心豈吝慰相憐所聞
不到荆門耳人老禾新又一年

次韻酬鄧子儀

青溪相值各青春老去臨流輒損神事事只隨波浪去年
年空得鬢毛新論心未忍遺橫日千世還憂近逆鱗嘉句
感君邀我厚自嗟才不異常人

送章宏

道合由來不易謀豈無和氏識荆璆一川潯水浮文鷁千
里輕帆落武丘身退豈嫌吾道進學成方悟衆人求西風
乞得東南守杖策還能訪我不

次韻酬宋玘

洗雨吹風一月春
山紅漫漫綠紛紛
寒裳遠野誰從我
散策空陂忽見君
青眼坐傾新歲酒
白頭追誦少年文
因嗟涉世終無補
久使高材雍上聞

寄余溫卿

雲散風流不自禁
天涯無路盍朋簪
空馳上國青泥信
誰和南山白石音
平日離愁寬帶眼
訖春歸思滿琴心
終回一命翩翩駕
獨過稽山鍛樹陰

送道光法師住持靈巖

靈巖開闢自何年
艸木神奇鳥獸僊
一路紫苔通官篠
千崖青靄落潺湲
山祇踴聚荒禪室
象衆低摧想法筵
雪足

莫辭重趼往東人香火有因緣

和楊樂道見寄

宅帶園林五畝餘蕭條還似茂陵居
殺青滿架書新繕生白當牕室久虛
孤學自難窺奧密重言猶得慰空疎
相思每欲投詩社只待春蒲葉又書

酬冲卿見別

同官同齒復同科朋友婚姻分最多
兩地塵沙今齟齬二年風月共婆娑
朝倫孰與君才似使指將如我病何
升黜會應從此異願偷閑暇數經過

次鄧河寄城北會上諸友

客路花時祇攪心行逢卻水半晴陰
黃城野色雲邊盡隔

屋春聲樹外淡香艸已堪回步履午風聊復散衣襟憶君
載酒相追處紅萼青跗定滿林

寄友人

水邊幽樹憶同攀曾約移居向此間欲語林塘迷舊逕却
隨車馬入他山飛花著地容難冶鳴鳥窺人意轉閑物色
可歌春不返相思空復慘朱顏

句
酬淨因長老樓上翫月見懷有疑君魂夢在清都之

道人心與世無求隱几蕭然在此樓坐對南梧傾曉月看
翻清露洗新秋登臨更欲邀元亮披寫還能擬惠休顧我
不知天上樂虛疑昨夜夢仙遊

懷舒州山水呈昌叔

山下飛鳴黃栗留溪邊飲啄白符鳩不知此地從君處亦
有他人繼我不塵土生涯休盪滌風波時事只飄浮相看
髮禿無歸計一夢東南卽自羞

示四妹

孟光求壻得梁鴻廡下相隨不諱窮卓犖才名今日事蕭
條門巷古人風五噫尚與時多忤一笑兼忘我屢空六月
塵沙不相貸泫然搔首又西東

寄袁州曹伯玉使君

宜春城郭繞樓臺想見登臨把一盃溼溼巔雲生竹箇冥
冥江雨熟楊梅政成定入邦人詠詩就還隨驛使來錯莫

風沙愁病眼不知何日爲君閒

次韻平甫金山會宿寄親友

天末海門橫北固烟中沙岸似西興已無船舶猶聞笛遠
有樓臺祇見燈山月入松金破碎江風吹水雪崩騰飄然
欲作乘桴計一到扶桑恨未能

登西樓

樓影侵雲百尺餘行人樓上憶天涯情多自悔登臨數目
極因驚悵望賒一曲平蕪連古樹半分殘日帶明霞潘郎
何用悲秋色祇此傷春髮已華

卽事

河流南苑岸西斜風有晶光露有華門柳故人陶令宅井

桐前日總持家嘉招欲覆杯中淥麗唱仍添錦上花便作
武陵樽俎客川源應未少紅霞

次韻再遊城西李園

京師花木類多奇常恨春歸人未歸車馬喧喧起塵土園
林處處鏤芳菲殘紅已落香猶在羈客多傷涕自揮我亦
悠悠無事者約君聯騎訪郊圻

奉寄子思以代別

南北蹉跎成兩翁悲歡邂逅笑言同全家欲出嶺雲外匹
馬肯尋山雨中趨府折腰嗟蹢躅聽泉分手惜匆匆寄聲
但有加餐飯才業如君豈久窮

長干寺

梵館清閑側布金小塘回曲翠文溪柳條不動千絲直荷
葉相依萬葢陰漠漠岑雲相上下翩翩沙鳥自浮沈羈人
樂此忘歸思忍向西風學越吟

留題微之廨中清輝閣

故人名字在瀛洲邂逅低徊向此留鴈鳥一雙隨坐笑荷
花十丈對冥搜水涵樽俎清如洗山染衣巾翠欲流宣室
應疑鬼神事知君能復幾來遊

金陵懷古

霸祖孤身取二江子孫都以百城降豪華盡出成功後逸
樂安知與禍雙東府舊基留佛剎後庭餘唱落船牕黍離
麥秀從來事且置興亡近酒缸

天兵南下此橋江敵國當時指顧降山水雄豪空復在君
王神武自難雙留連落日頻回首想像餘墟獨倚牕却怪
夏陽纔一葉漢家何事費罍缸

地勢東回萬里江雲間天闕古來雙兵纏四海英雄得聖
出中原次第降山水寂寥埋王氣風烟蕭颯滿僧牕廢陵
壞冢空冠劍誰復沾纓爵一缸

憶昨天兵下蜀江將軍談笑七爭降黃旗已盡年三百紫
氣空收劍一雙破堞自生新艸木廢宮誰識舊軒牕不須
搔首尋遺事且倒花前白玉缸

次韻舍弟遇子固憶少述

時舍弟在臨川

歸計何時就一塵寒城回首意茫然野林細錯黃金日溪

岸寬圍碧玉天飛兔已闌追腰裏太阿猶恨失龍泉遙知
更憶河濱友從事能忘我獨賢

次韻答平甫

高蟬抱殼悲聲切新鳥爭巢諍語忙長樹老陰欺夏日晚
花幽艷敵春陽雲歸山去當簷靜風過溪來滿坐涼物物
此時皆可賦悔予千里不相將

金明池

宜秋西望碧參差憶看鄉人襖飲時斜倚水閒花有思緩
隨風轉柳如癡青天白日春常好綠髮朱顏老自悲跋馬
未堪塵滿眼夕陽偷理釣魚絲

送趙燮之蜀永康簿

蜀山萬里一青袍石棧天梯筍轡高多學似君寧易得小
官於此亦徒勞行追西路聊班艸坐憶南州欲夢刀他日
寄聲能問我應從錦水至江臯

九日登東山寄昌叔

城上啼烏被寂寥思君何處坐岩堯應須綠酒隣黃菊何
必紅裙弄紫簫落木雲連秋水渡亂山烟入夕陽橋淵明
久負東籬醉猶分低心事折腰

到舒次韻答平甫

夜別江船曉解驂秋城氣象亦潭潭山從樹外青爭出水
向沙邊綠半涵行問耆夫多不記坐論公瑾少能談只愁
地僻無賓客舊學從誰得指南

答劉季孫

偶著儒冠敢陋今自憐多負少時心
輕軒已任人前後揭厲安知世淺深
挾筴有思悲慷慨負薪無力病侵淫
愧君綠綺虛投贈更覺貧家報乏金

寄吳成之

綠髮溪山笑語中豈知翻手兩成翁
辛夷屋角搏香雪躑躅江頭挽醉紅
想見舊山茅徑在近隨今日板輿空渭陽
車馬嗟何及榮祿方當與子同

寄曾子固

斗粟猶慙報禮輕敢嗟吾道獨難行
脫身負米將求志戮力乘田豈爲名
高論幾爲衰俗廢壯懷難值故人傾
荒城

回首山川隔更覺秋風白髮生

至開元僧舍上方次韻舍弟二月一日之作

溪谷濺濺嫩水通野田高下綠蒙茸和風滿樹笙簧雜霽
雪兼山粉黛重萬里有家歸尚隔一塵無地去何從傷春
故欲西南望回首荒城已暮鐘

寄王回溪甫

少年倏忽不再得後日歡娛能幾何顧我面顏衰更早憐
君身世病還多牕間暗淡月含霧船底飄飄風送波一寸
古心俱未試相思中夜起悲歌

次韻舍弟賞心亭卽事二首

檻折簷傾野水傍臺城佳氣已消亡難披梗莽華千古獨

倚青冥望八荒坐覺塵沙昏遠眼忽看風雨破驕陽扁舟
此日東南興欲盡江流萬里長

霸氣消磨不復存舊朝臺殿祇空邨孤城倚薄青天近細
雨侵凌白日昏稍覺野雲成晚霽卻疑山月是朝暉此時
江海無窮興醒客忘言醉客喧

次韻陳學士小園卽事

牆屋雖無好鳥鳴池塘亦未有蛙聲樹含宿雨紅初入艸
倚朝陽綠更生萬物天機何得喪百年心事不將迎與君
杖策聊觀化搔首春風眼尚明

次韻春日卽事

人間尚有薄寒侵和氣先薰艸樹心丹白自分齊破蕾青

黃相向欲交陰漉漉嫩水生幽谷漠漠輕烟動遠林病得
一官隨太守珍春無助愧周任

次韻答陳正叔二首

青衫憔悴北歸來髮有霜根面有埃羣吠我方憎獅子一
鳴誰更識龍媒功名落落求難值日月沄沄去不回勝事
與身何等近酒樽詩卷數須開

田宅荒涼去復來詩書顏髮兩塵埃忘機自許鷗相狎得
禍誰期鶴見媒此道未行身有待古人不見首空回何當
水石他年住更把韋編靜處開

姑胥郭

誤褫雲巾別故山抵吳由越兩間關千家漁火秋風市一

葉歸舟暮雨灣旅病悵悵如困酒鄉愁脈脈似連環情知
帶眼從前緩更恐顛毛自此斑

太湖恬亭

檻臨溪上綠陰圓溪岸高低入翠微日落斷橋人獨立水
涵幽樹鳥相依清遊始覺心無累靜處誰知世有機更待
夜深同徙倚秋風斜月釣船歸

自金陵如丹陽道中有感

數百年來王氣消難將前事問漁樵苑方秦地皆蕪沒山
借揚州更寂寥荒墟暗鷄雉月曉空場老雉挾春驕豪華
祇有諸陵在往往黃金出市朝

除夜寄舍弟

一尊聊有天涯憶百感翻然醉裏眠酒醒燈前猶是客夢
回江北已經年佳時流落去何得勝事蹉跎只可憐惟有
到家寒食在春風因泛潁溪船

聊行

聊行弄芳艸獨坐隱團蒲問客茅簷日君家有此無

題齊安壁

日淨山如染風暄艸欲薰梅殘數點雪麥漲一溪雲

再題南澗樓

北山雲漠漠南澗水悠悠去此非吾願臨分更上樓

南浦

南浦隨花去迴舟路已迷暗香無覓處日落畫橋西

夢

黃梁欲熟且留連
漫道春歸莫悵然
蝴蝶豈能知夢事
遽飛墮晚花前

初晴

幅巾慵整露光華
度隴溪尋一徑斜
小雨初晴好天氣
晚花殘照野人家

雪乾

雪乾雲淨見遙岑
南陌芳菲復可尋
換得千顰爲一笑
春風吹柳萬黃金

竹裏

竹裏編茅倚石根
竹莖疎處見前邨
閑眠盡日無人到
自

有春風爲掃門

歸庵

稻畦藏水綠秧齊松鬣初乾尚有泥縱寒尋岡歸獨卧東
庵殘夢午時雞

寄蔡天啟

杖藜綠塹復穿橋誰與高秋共寂寥佇立東岡一搔首冷
雲衰艸暮迢迢

招楊德逢

山林投老倦紛紛獨卧看雲卻憶君雲尚無心能出岫不
應君更懶於雲

同熊伯通自定林過梧真

與客東來欲試茶
倦投松石坐欹斜
暗香一陣連風起
知有薔薇澗底花

悟真院

野水從橫漱屋除
午牕殘夢鳥相呼
春風日日吹香艸
山北山南路欲無

萬事

萬事黃梁欲熟時
世間談笑漫追隨
雞蟲得失何須算
鵬鷃逍遙各自知

柘岡

萬事紛紛祇偶然
老來容易得新年
柘岡西路花如雪
迴首春風最可憐

城北

青青千里亂春袍
宿雨催紅出小桃
迴首北城無限思
日酣川淨野雲高

午枕

午枕花前簾欲流
日催紅影上簾鉤
窺人鳥喚悠颺夢
隔水山供宛轉愁

和張仲通憶鍾陵

一夢章江已十年
故人重見想皤然
祇應兩岸當時柳
能到春來尚可憐

送和甫至龍安暮歸

隱隱西南月一鉤
春風落日澹如秋
房櫳半掩無人語
鼓

角聲中始欲愁

鍾山卽事

澗水無聲繞竹流
竹西花艸弄春柔
茅簷相對坐終日
一鳥不鳴山更幽

日西

日西階影轉梧桐
簾卷青山罨半空
金鴨火銷沈水冷
悠悠殘夢鳥聲中

御柳

御柳新黃已迸條
宮溝薄凍未全消
人間今日春多少
祇看東方北斗杓

禁中春寒

青

一作浮

烟漠漠雨紛紛水殿西廊北苑門已著單衣猶禁

火海棠花下怯黃昏

春雨

城雲如夢柳飀飀野水橫來強滿池九十日春渾得雨故
應留潤作花時

次吳氏女子

吳氏詩云西風不入小牕紗秋氣應憐我憶家極目江南千里恨依然和淚看

黃花南朝九日臺在孫陵

曲街旁去吾園只數百步

孫陵西曲岸烏紗知汝淒涼正憶家人世豈能無聚散亦
逢佳節且看花

江寧夾口

茅屋滄洲一酒旗午烟孤起隔林炊江清日暖蘆花轉毳

一作
恰似春風柳絮時

三品石

艸沒苔侵棄道周誤恩三品竟何酬國亡今日頑無恥似
爲當年不與謀

次韻杏花

只愁風雨劫春回怕見枝頭爛熳開野鳥不知人意緒啄
教零亂點蒼苔

杏花

垂楊一徑紫苔封人語蕭蕭院落中獨有杏花如喚客倚
牆斜日數枝紅

泊姚江

山如碧浪翻江去木似青天照眼明
喚取仙人來住此莫教辛苦上層城

春入

春入園林百艸香池塘冰散水生光
身閑是處堪攜手何事低徊雨鬢霜

春日席上

十年流落負歸期臨水登山各有思
今日樽前千萬恨不堪頻唱鷓鴣辭

北望

欲望淮南更白頭杖藜蕭瑟倚滄洲
可憐新月爲誰好無數晚山相對愁

松江

來時還似去時天
欲道來時已惘然
祇有松江橋下水
無情長送去來船

中秋夕寄平甫諸弟

浮雲吹盡數秋毫
爍爍金波滿滿醪
千里得君詩挑戰
夜壇誰敢將風騷

無錫寄正之

健席高檣送病身
亂山荒隴障歸津
應須一曲千回首
西去論心更幾人

天童山溪上

溪水清漣樹老蒼
行穿溪樹踏春陽
溪深樹密無人處
惟

有幽花渡水香

鄞縣西亭

收功無路去無田竊食窮城度兩年更作世間兒女態亂
栽花竹養風烟